

范德機詩集

二

蘇子雲  
船  
PDC

范德機詩集卷之四

歌行曲類

贈海康舉進士者

聖主徵儒用文學翩翩五士起海角元戎席帳飛薦  
鸚泮水成材玉新琢吉日舉薦鐘鼓作皇華大夫績  
朱襮快馬鑿蹄輪脫斷相送西風出郊郭問君此行  
事何若於菟要是赤手縛候鴈南飛不踰岳洞庭山  
秋木葉落詞場先鋒奪霜鏑萬里青山上黃鶴明光  
宮中問禮樂董生策有經濟略一朝聲名動河朔往  
取青紫如六博前年禮闈開峻擢明當接武絲綸閣

歸來錦衣照正壑人生無如進士樂烏乎人生無如  
進士樂勗爾高步翔寥廓

送鞠

卧病高秋留海浦明日重陽更風雨杜門不出長蒼  
苔令我天涯心獨苦籬角黃花親手栽近節如何獨  
未開含芳悶采亮有以使君昨暎微詩來凌晨試遣  
霜根送春玉雖微甚珍重極知無意競秋光往作橫  
窗歲寒供憶我初客天子都西垣植此常千株結花  
年年應吹帽始信南邦事盡殊願得封培自今日何  
間朱厓萬家室秋香端不負乾坤但願簫管亂疇匹  
歸去來兮雖得歸念歸政自莫輕違他日采英林下

酌誰向清霜望翠微

奉新縣樓對月望浮雲山李八百洞超然  
有懷

白露浥宵桂月滿浮雲山遙想山中人與我身俱閑  
少日曾陪供奉班流浪三千隨百蠻海水接天看不  
足却歸萬壑聽潺湲累土成岳諒非艱蚤服玄英勘  
大還金闕玉清名籍在不應猶自戀人間

閩州歌

閩州土俗戶不分生子數歲學繡文圖綳坐肆襍男  
女誰問小年曾識君古來夜行斯秉燭今者衢路走  
紛紛那更誅求使使者急鞭箠一似雞羊群古來閩閩

佩箴管令者女工徵六軍雖復太平少征戰設有備  
豫將何云去年居作匠五千耗費府藏猶烟雲官胥  
招克常十八况以鳩歛奪耕耘祗令棄置半不用民  
勞竟是誰懽忻歲歲條章省煩費幸且不省無方殷  
唐虞在上儉且勤後王猶復錦綉焚豈有夔龍讓姚  
宋不言忍使憂心熏觀風自是使者職作歌雖遠天  
應聞

奉陪京城諸友遊南城尋工尊師道場作  
我本漁釣清江濱三生自是華蓋君往逆竹浦拾明  
月初向芝山尋白雲聞有仙人姓工者舊廬正在燕  
城下杖藜步步躡天梯千尺雲門淨如灑門前水流

清且深朗如石鏡開煩襟中有幅輪碾浩劫多見聽  
者無知音高莫高兮嵩山之中岑幽莫幽兮壺嶠之  
雲林萬金買間不易得到城市無歸心堯舜之事  
俱寂寞獨劉一人在正壑問渠羽駕來仙壇夜夜踈  
星迷皓鶴我為長春行興在碧草間白日又欲暮浮  
雲無時還十年住天都塵土汙客顏於此意不惟冷  
然遂懷山更將携手上烟蘿曾是軒轅弓劍過我來  
正值五月半青天漸少綠陰多每思東山公興來恣  
婆娑左持玉塵揮俗客右引采扇遍天娥明時豪達  
盡如此逝且不樂今如何我亦欲喚細腰舞白馬馱  
酒金叵羅誠恐道人嗔我慢空遣弟子來相看上堂

椎鼓日色晏孤我青精白石飭黃金臺前春已歸海  
榴花發乳燕飛同行佳人莫相違相思更贈女蘿衣

贈劉山人遊湖南

楚山高高楚水清之子西還渡遠行手持空縣寶月  
鑑人中到處測公卿楚有羈臣面如削千載姦諛膽  
鷺落誰能早向太平年識得聲名等光岳洞庭湖上  
莎草生湘娥祠下鷓鴣鳴與人言必擬忠孝豈獨賣  
卜巖君平子言亦是蜀州士家寄錢塘小江涘九野  
飛鴻逐便風行色將我泛湖水湖水上幾時來自古  
生才湏世用試為令人青眼開

搗練圖

深宮佳人白日長夜感蟋蟀鳴中房起視河漢心回  
皇雲鬢籠鬆分作行清水如天收素練翠蛾帶月杵  
玄霜轆轤无繩金井悄邊頭不見梧桐黃裁縫熨貼  
坐在牀戴玄戴黃公子裳制成不遠煩寄將但見寒  
暑彫三光身体甚遠平時康君不見古來邊庭士雪  
壓関河征戰多折盡衣裘淚如水

題李白郎官湖

當時郎官奉使出咸原仙人千里來相迎畫船吹笛  
弄綠水何意芳洲遺舊名唐祠蕪沒知何代惟有東  
流水長在黎侯獨起梁棟之彷彿雲中昔軒蓋南飛  
越鳥北飛鴻今古悠悠去住同富貴何如一杯酒愁



來无地貯西風大別山高幾千尺隔城正與祠相直  
青猿夜抱月光啼挂在東湖之石壁黎侯本在斗南  
家枕戈猶自憶烟霞祇擬將身報天子不負宵中書  
五車昨者相逢玉闕下別來幾日秋滿洒黃葉當頭  
亂打人門前繫着青驄馬君今歸去釣晴湖我亦明  
年辭帝都君過湖邊定相見為問仙人安穩無

王氏能遠樓

遊莫羨天池鵬歸莫問遼東鶴人生萬事須自為跬  
步江山即寥廓請君得酒勿少留為我痛酌王家能  
遠之高樓醉捧勾吳匣中劍斫斷千秋萬古愁滄溟  
朝旭射燕甸桑枝正搭虛牕面昆崙池上碧桃花舞

盡東風千萬片  
千萬片落誰家  
願傾海水溢流霞  
寄謝尊前望鄉客  
底須惆悵惜天涯

梁掾枉教冬菊之歌仍韻答貺

中書省郎梁茂才嗜好雅與時流乖  
休衙歸來紫閣戶  
剩啄或為幽人開  
屋前枯楊千萬樹  
屋後官槐傍官路  
別起新亭翼瓦間  
晝閱黃花夜吟句  
自別仙城白兔公  
采英泛菊九秋同  
江清木落寒鴈遠  
我思古人煙浪中  
彼美人兮無此美  
不見憂兮見之喜  
本是千宮萬壑姿  
如何宵落君家裏  
昨夜遣詩兒過門  
挑燈三誦月黃昏  
更酬迭唱未足報  
要須共倒花前尊  
君不見長安富兒  
買歌笑意擲千金  
惜年少桃李如

今不似春勗子含和保貞曜

錢舜舉畫馬歌

錢君畫人勝畫馬安得名  
驄妙天下青雲隱約見龍  
紋有意軒昂駛華夏圍官山立頰而髯  
朱衣黑帶高帽尖問渠掌握詎有此牽控寧知人女嬃君不見才士受束縛往往因之縱寥廓

杏葉黃

杏葉黃天雨霜穹窿攜日照八荒  
回光照見白玉堂  
堂中美人嗷嗷璫中宵抱被直西廂  
忠君愛親兩不忘  
奈何零露沾衣裳清曉樓頭見征鴈  
不如謝官歸故鄉

題姑蘓丁氏一樂齋

人生開口日幾何一日所得亦已多請君為我酌美酒我當為君歌樂歌堂上仙翁紫錦袍堂中碩人冠嵯峨瑤池日遲眩五色椿樹春生交萬柯借問綠衣行者誰丁家令緒如絲蘿兄弟無故父母存此語未必慙鄒軻况昔知君在朝列贊教國胄懸瓊珂當時權倖悉故舊青紫可拾不宥阿扁舟一去江海遠事實由已非由他他人束縛我掉手此又一樂信所過要當高名日益昇使廡如華分如河歸掩茅齋坐清香松竹交蔭花成窠丈夫所就類如此劍絕即與浮雲摩聊題長歌送君去出門堅笑臨鷗波

贈彭生

自來西垣二月吉品裁良士無虛日上感天子大聖  
明下知朝政靡闕失耳聞目見心所然莫此名郡彭  
君賢辭官歸養終二親流水二十有四年古人作官  
計百世令人動作晦朔計赤面持籌舞銓吏哀哉賢  
愚同一致豈知彭生後時寵更二十年猶如至耕田  
足雨稻刺波種樹繞天花照地未知羲和多少事但  
願堯舜一萬歲千鍾有待亦人情尺璧無瑕乃士貴  
四牡以之不為傷蓼莪以之不為廢王人若徵雅道  
闕清廣朱弦倚三二美哉彭生泚慶源孝子亦在忠  
臣門幾人嘆嗟向穹昊下馬指點銅臺村

侏儒行

君不見東方朔長九尺餘不如侏儒長三尺朝捧一  
囊錢夕竟飽死復何益死者不可作飢者食有餘堂  
堂之軀天所命生之短者續則悲嗟哉世之人羨彼  
侏儒復何為

輓轡怨

門前水揚穀似兩幽人當牕碧弦語東里征夫去不  
歸一雙蛾眉鏡中舞年年井上攀輓轡勞心只恐秋  
葵枯他家種得長生草梅花落盡青青好

田君寫真

田君力幹成霜鐵一筆能開萬豪傑總是人間敵海

愁但自不忘泓穎別我所思兮大江濱欲往致之道  
路分安得煩君寫作巫山與洛中有美人兮泛波上  
之遊鴻行巖巔之素雲烏乎此君不可見獨立乾坤  
淚如霰

贈鄭元澤別

燕城閉門百花節鄭郎騎驢索我別示我高人王右  
丞輞川之圖澹明滅一從辭山去吳越寤寐鄉閔五  
情熱偶逢此卷即欣然人間何處無竒絕虞生教授  
司成館文字精神萬人傑品題一百二十言一言不  
作溪山說卿云亦有溪山趣事與虞言當合轍贈朋  
與親各有義頗媿紅塵驅蹇拙更欲相留度小春夜

深縞杏都成雪平旦何以畫荅圖為解臨江雙珮玦

張月梅子昂竹石圖歌

近來海內寫竹石集賢學士有李衍吳興翰林公更  
神大抵不令石作板半幅蕭蕭烟霧枝如卷中有千  
尺竒洞穴常起鬼神疑嵩華衡岱狎童兒金溪處士  
清似鶴携此隨秋訪幽壑我憶為公故察吏細撫遺  
書淚淚落吁嗟翰林今世無一筆猶可重江湖鳴鳳  
之下出瑾瑜高風况足勵頑夫

西黎歌

一十三縣海之州四城結帶相綢繆中有羣黎集百  
峒耕鑿不知堯舜憂手扶長弓架鈎箭白馬白似雪



花片此又外黎漸漢習仇殺從前如旅勸春花滿山  
禾滿臯婦饋壺漿夫血戰曾不如深居不識礼教人  
又誰使之郡若縣黎霧山高裹白雲哀猿驚鹿夜深  
聞下瀨戈舡今已遠行人猶說路將軍

掘塚歌

昨日舊塚掘今朝新塚成塚前两翁仲送舊還迎新  
舊魂未出新魂入舊魂還對新魂泣舊魂丁寧語新  
魂好地不用多子孫子孫綿綿如不絕曾孫不掘玄  
孫掘我今掘矣良可悲不知君掘又何時

望瀛海一首送危太樸之四明兼簡廉訪  
鄧使君翰林袁侍講